

LISTOVI GRAČANIČKOG KALENDARA OD 19.11.2010. DO 28.04.2011.

Dr. sc. Omer Hamzić



19. 11. 2010.

**OTKRIVENO SPOMEN-OBILJEŽJE ŠEHIDIMA I POGINULIM
BORCIMA U RATU ZA BIH (1992. – 1995.) U GORNJOJ
ORAHOVICI**

Na spomeniku je ispisano 10 imena poginulih boraca s područje Gornje Orahovice, koji su se borili gotovo na svim ratištima u Bosnu i Hercegovini. Narod ovog sela podigao je spomenik u znak trajnog sjećanja na te likove, koji daduše život braneci Bosnu. Uz članove porodica poginulih, ceremoniji otkrivanja spomenka prisustvovao je i veliki broj građana, kojima su se obratili predsjednik Mjesne zajednice



■ SPOMEN-OBILJEŽJE U GORNJOJ ORAHOVICI

Gornja Orahovica Vehid Osmanović, općinski načelnik Nusret Helić i ministra za boračka pitanja TK Bahrija Mehurić.

23. 11. 2010.

23. SJEDNICA OPĆINSKOG VIJEĆA: GLAVNA TEMA OVE SJEDNICE BIO JE REBALANS OVOGODIŠNJEG OPĆINSKOG BUDŽETA

...koji je uslijedio, kako je rečeno, "zbog smanjenja poreznih i neporeznih prihoda i potrebe usaglašavanja izdataka, te novih izdataka koji su rezultat odobrenih namjenskih sredstava viših nivoa vlasti ili drugih grant sredstava." Po rebalansu budžet je utvrđen u iznosu od 11.223.000 KM i veći je za 87.000 KM od prvobitno planiranog. Budžet nije smanjen, ali je došlo do devijacija u njegovoj strukturi. To se posebno odnosi na prihode koji su manji za 705.500 KM, od čega su porezni manji za 336.000 KM, neporezni za 100.000 KM i tekuće potpore za 279.500 KM. Zato je i moralo doći do smanjenja ranije planiranih izdataka. Nakon obavljene rasprave, rebalans budžeta za 2010. godinu usvojen je sa 18 glasova "za" i 9 suzdržanih glasova.

Odluka o izmjenama i dopunama Etičkog kodeksa izabranih zvaničnika općine Gračanica, koja je predviđala nešto malo oštrije sankcije za vijećnike u slučaju kršenja nekih odredaba tog akta. Od značajnijih tačaka, vrijedno je spomenuti da je sa ove sjednice upućen u javnu raspravu Nacrt budžeta općine Gračanica za 2011. godinu, koji je planiran u iznosu od 11.284.000 KM.

Na javnu raspravu upućen je i Nacrt Odluke o usvajanju i provođenju regulacionog plana "Radna zona III" Gračanica

25. 11. 2010.

OTKRIVENO SPOMEN-OBILJEŽJE ŠEHIDIMA I POGINULIM BORCIMA U RATU ZA BIH (1992. – 1995.) U RAŠLJEVI

Na spomeniku su ispisana sljedeća imena: Sejdinović Hasiba Refik, rođen 24. 0. 1970., poginuo 27. 12. 1992.; Babajić Derviša Mersudin, rođen 27. 01. 1972., poginuo 10. 09. 1995.; Softić Bećira Hajrudin, rođen

23. 08. 1963, poginuo 07. 09. 1994., Vehabović Hašima Hajrudin, rođen 06. 05. 1967., poginuo 27. 12. 1992. i Hasanbegović Ibrahim Samir, rođen 07. 10. 1968., poginuo 14. 05. 1992. godine. To su oni koji su dali život za slobodu i prosperitet ove države, rečeno je u prigodnim govorima na ceremoniji otkrivanja spomenika. Porodicama poginulih i velikom broju građana i boraca obratili su se predsjednik mjesne zajednice Zijo, načelnik općine Nusret Helić i ministar za boračka pitanja TK Bahrija Mehurić.



■ SPOMEN-OBILJEŽJE U RAŠLJEVI

27. 11. 2010.

ODRŽANA OSNIVAČKA SKUPŠTINA UDRUŽENJA VJEROUČITELJA TUZLANSKOG KANTONA

Skupštini je prisustvovalo oko šezdeset vjeroučitelja, a kao posebni gosti, prisutni su bili dr. Amir ef. Karić, glavni imam Medžlisa IZ Tuzla i gospodin Mirzet Pozderović, predsjednik Samostalnog sindikata osnovnog obrazovanja Tuzlanskog kantona. Skupština je usvojila Statut i izabrala Glavni odbor u sastavu: Alem Dedić (predsjednik), Admira Suljkanović (zamjenik), Samir Dedić (sekretar), Nihad Salihović (PR), te članovi Armin Čeragić, Emir Grahić, Rijad Imamović, Sedžida Kotorić i Fadil Bajrami. Tako su, nakon sarajevskih i tuzlanski vjeroučitelji islamske vjeronauke konstituisali svoje kantonalno udruženje.

9. 12. 2010.

**OBIJEŽAVANJE 15. GODIŠNJICE
UTEMELJENJA I TRIDESET BROJEVA
"GRAČANIČKOG GLASNIKA" – POČELI
SLIKARI I PJESNICI "IZ OVOG ČASOPISA"**

U želji da adekvatno obilježi ovaj značajan jubilej i naglasi doprinos Časopisa afirmaciji kulturno-historijskih vrijednosti ne samo Gračanice, već i šire, te da pokaže dostignuća, ali i iskustva stečena u radu na ovom projektu, Redakcija Časopisa je sačinila i realizovala nekoliko programskih sadržaja, koji odražavaju duh i koncept Časopisa. Ti kulturni sadržaji pobudili su pojačanu pozornost kako lokalne, tako i šire javnosti. Obilježavanje je počelo vrlo uspjelom smotrom pod naslovom "Slikari i pjesnici "Gračaničkog glasnika", koja je organizovana uz pomoć omladinskog udruženja "Anea", "Preporoda" i BKC. Bilo je to jedno nekonvencionalno druženje, uz lijepu riječ i odabrane umjetničke slike i još ljepšu priču u Omladinskom klubu BKC.

10. 12. 2010.

**OBIJEŽAVANJE 15. GODIŠNJICE
UTEMELJENJA I TRIDESET BROJEVA
"GRAČANIČKOG GLASNIKA" – NAUČNI SKUP
"ISTRAŽIVANJE LOKALNE HISTORIJE U
BOSNI I HERCEGOVINI"**

Skup je organizovan na inicijativu Instituta za istoriju u Sarajevu, a u povodu 15. godišnjice utemeljenja i 30 brojeva časopisa *Gračanički glasnik*. Pored Instituta, suorganizatori su bili Izdavačka kuća "Monos" i Redakcija Časopisa "Gračanički glasnik". Finansijsku podršku i pomoć pružili su stalni sponzori Časopisa i Općina Gračanica.

U radnom dijelu Skupa učestvovala su 25 naučnih radnika iz Sarajeva, Tuzle, Mostara, Zenice, Gračanice i Bijeljine sa ukupno 24 teme koje su izložene kroz tri zaokružene tematske cjeline. U prvoj je izložen opći pristup pitanjima lokalne historiografije, u drugom je tematiziran "Gračanički glasnik" i lokalna historija, dok je u trećem prezentirano nekoliko konkretnih tema iz lokalne historije.

10. 12. 2010.

**"GRAČANIČKI GLASNIK I PRIJATELJI" –
ZAVRŠNA MANIFESTACIJA OBIJEŽAVANJA
15. GODIŠNJICE UTEMELJENJA I 30
BROJEVA "GRAČANIČKOG GLASNIKA"**

Riječ je o svečanoj akademiji koja je organizovana u velikoj Sali i na holovima Borskog kulturnog centra u Gračanici. Prvo je prikazan dokumentarni film "Gračanički glasnik – glas o nama", autora Fahrudina Kurtovića, u kojem je data retrospektiva razvoja ovog izdavačkog projekta. Nakon filma obavljena je promocija 30., jubilarnog broja "Gračaničkog glasnika". O sadržaju ovog broja govorio je mr.sc. Rusmir Djedović, urednik u Redakciji Časopisa. Potom su dodijeljena prigodna priznanja Redakcije, odabranim autorima, promotorima i sponzorima projekta. Nakon dojele priznanja, uslijedio je mini koncert: fusion-sevdah band "Etno-art" i izložba kreativne fotografije Naide Vikalo i Ajle Salihbašić u foajeu BKC.

15. 12. 2010.

**VLASNIK FIRME "KOVAN" IZ GRAČANICE,
SAID KARALIĆ – "NAJMENADŽER BIH"
DRUGI PUT**

Ovo prestižno priznanje dobio je u kategoriji malih i srednjih preduzeća, među kojima se već duže vrijeme "Kovan" ističe uspješnom proizvodnjom eko-kotlova na biomasu za zagrijavanje stambenih i poslovnih prostora. Za relativno kratko vrijeme stvorio je respektabilnu firmu, koja se kvalitetom i atraktivnošću svog proizvodnog programa pročula daleko izvan granica BiH. U firmi se trenutno radi na novoj investiciji: izgradnja novog poslovnog prostora i stvaranje uslova za osavremenjivanje i proširenje proizvodnje, te novo zapošljavanje.

23. 12. 2010.

**KOMPANIJA ŠIRBEGOVIĆ POTPISALA
UGOVOR SA ŽELJEZNICAMA REPUBLIKE
SRPSKE O PRIJEVOZU**

Potpise na Ugovor o poslovnoj saradnji Širbegovića i Željeznica Republike Srpske stavili su predsjednik Kompanije Faruk Širbegović i v.d. direktora Željeznica Zdravko

Savić. “Ugovor je vrijedan 2 miliona i 250 hiljada KM, a odnosi se na transport preko 125 hiljada tona na tržište Hrvatske i Srbije. Okvirno, poslovi bi se mogli proširiti na vrijednost 4 miliona maraka i 250 hiljada prevezenih tona. Zahvaljujući razumijevanju i kooperativnosti menadžmenta Željeznica RS dobili smo veliki posao East gate-a u Zagrebu”, izjavio je nakon stavljanja potpisa na taj ugovor predsjednik Grupe “Širbegović” Faruk Širbegović. “Željeznice RS intenzivno nude svoje usluge na području BiH” - kazao je v.d. direktora Željeznica RS Zdravko Savić i dodao: “Danas nam je posebno zadovoljstvo što smo potpisali ugovor sa našim komšijama, kompanijom “Širbegović”. Ovaj ugovor je i potvrda opravdanosti postojanja terminala Sočkovac, jer će uslijediti ulaganje u opremu – novi poslovi znače i nove zarade” (izvor: Radio Gračanica)

23. 12. 2010.

IZBOR NAJBOLJIH SPORTISTA ZA 2010.

Za razliku od ranijih godina, Općinski sportski savez, kao organizator, potrudio se da dodjelom nekih novih priznanja nadomjesti nešto slabije rezultate koje su u ovoj godini ostvarili sportaši Gračanice. Tako su priznanja za razvoj sporta na području općine dobili: rukometni sudija Mevludin Šabić, kik boks nada Evrope, Amer Osmanhodžić, novinar Adnan Džafo i prof dr. Osman Bukvić, kao jedna od legendi BH košarke. Po prvi puta ove godine dodijeljena su i posthumna priznanja za bivše zaslužne sportiste i sportske radnike: Emina Jahića, Ibrahima Sejdinovića, Ramu Kujundžića i Edima Helića.

Za najboljeg sportistu invalida proglašen je Hasib Salkanović, košarkaš u kolici. Najuspješniji sportski radnik za 2010. godinu je Džemaludin Šarac iz Biciklističkog kluba Gračanica. Najuspješniji junior je Avdo Kurtović, član Košarkaškog kluba Gračanica, a Almedina Štilić, članica Karate kluba “Lavovi” najuspješnija je juniorka. U kadetskoj konkurenciji priznanja su dobili: Admir Ahmetašević iz rukometnog kluba

Gračanica “Indeks”, te Dženita Omerašević, članica Karate kluba “Lavovi”. Najuspješniji sportski kolektiv u 2010. godini u muškoj konkurenciji je Nogometni klub “Bratstvo”, dok su odbojkašice Gračanice najuspješniji sportski kolektiv u ženskoj konkurenciji. Najuspješniji trener ove godine je Ferid Imamović, trener nogometaša “Mladosti” iz Malešića.

Sakib Mehanović, član Karate kluba “Gračanica” i Melita Imširović članica ŽOK-a “Gračanica”, najuspješniji su sportisti općine Gračanica u 2010. godini. (portal BKC Gračanica)

23. 12. 2010.

**KOMPANIJA ŠIRBEGOVIĆ U 2010:
ZADRŽALA STATUS JEDNE OD VODEĆIH
GRAĐEVINSKIH KOMPANIJA U REGIJI
JUGOISTOČNE EVROPE**

Ovo je sa zadovoljstvom istaknuto na tradicionalnom novogodišnjem okupljanju zaposlenika, ključnih poslovnih partnera, prijatelja i gostiju Kompanije u kratkom osvrtu na proteklu, za poslovanje, veoma tešku godinu. I pored krize, Kompanija se po uspješnosti poslovanja zadržala u elitnom društvu vodećih građevinskih kompanija u ovom dijelu Evrope. Koliki je to rezultat i u kakvim uslovima je ostvaren najbolje ilustruje podatak Svjetske banke da je naša država rangirana na 110. mjestu po “lakoći poslovanja”.

Na osnovu službenih tržišnih analiza, Kompanija “Širbegović” na tržištu BiH ima udio od 45% u komercijalnom sektoru. Po ključnim elementima proizvodnje, visoko je rangirana i na tržištu jugoistočne Evrope: betonske i čelične konstrukcije među vodeće 3 firme, a industrijski prostor među vodećih 5 firmi.

U tom kontekstu, ističu se i dobri finansijski rezultati Kompanije: u 2009. ostvaren je prihod od 60 miliona KM, profit od 9 mi-

 **ŠIRBEGOVIĆ**
grupa

liona KM, uz nenaplaćenih 14 miliona KM potraživanja. U drugoj polovici 2010. godine, naplaćen je značajan dio potraživanja, izuzev Libije. I pored ovako teških uslova, uspjeli smo da isplaćujemo plate zaposlenicima, kao i da izmirujemo preostale obaveze, koje omogućavaju nesmetano funkcionisanje firme, rečeno je na ovom skupu.

Poslovna dinamika u proteklom godinama potvrđuje sposobnost Kompanije da iznalazi odgovore na mnoge izazove, te da uspješno prebacuje operacije na različita tržišta, poput Libije i Njemačke.

Kako dalje? Kratak odgovor na to pitanje dao je osnivač i predsjednik Kompanije, inž. Faruk Širbegović: "Da bismo dali cjelovit odgovor na krizu, odlučili smo da izradimo strategiju poslovnog razvoja za narednih 5 godina. Tom strategijom smo definirali 3 ključna cilja: fokus na glavne kompetencije, sektorska diverzifikacija i međunarodna ekspanzija. Za realizaciju ovih ciljeva, neophodno je da izgradimo strateške saveze na pojedinim tržištima, kroz koje bismo ojačali našu tržišnu poziciju. Dobar primjer je saradnja sa firmom Max Boegl na tržištu Njemačke u realizaciji projekta aerodroma u Berlinu."

Kao preduslov za implementaciju nove strategije, izvršene su značajne promjene u organizaciji kompanije, koja se temelji na tri sektora: prodajni, inženjering i support sektor. Ključni ciljevi prodajnog sektora su: uposlenost kapaciteta, podizanje efikasnosti prodajnih timova, uvođenje nove kulture prodaje i poslovnog razvoja, uz poseban fokus na upravljanje odnosa sa kupcima; ključni ciljevi inženjering sektora su: uspješno izvršenje ugovora, sa posebnim akcentom na budžetiranje ugovora, obezbjeđenje kvaliteta i rokova, te izgradnju i održavanje dobrih odnosa sa kooperantima i dobavljačima; ključni ciljevi support sektora su: finansijska stabilnost i pružanje cjelokupne podrške prodajnom i inženjering sektoru.

U 2011. godini planira se konsolidovani prihod, uključujući Libiju, od cca. 90 milio-

na KM. To je dosta ambiciozan, ali i ostvariv plan, jer se temelji na većem broju potpisanih ugovora.

25. 12. 2010.

UZ MNOGO RADA I SAMOODRICANJA U STJEPAN POLJU JE IZGRADEN NOVI SISTEM VODOSNABDIJEVANJA

Sistem se sastoji od sedam rezervoara, kapaciteta 570 kubnih metara. Svi su raspoređeni po visinskim kotama i međusobno su spojeni mrežom od 25 kilometara cjevovoda. Vodovodni sistem se puni sa dva prirodna izvorišta, čiji kapaciteti zadovoljavaju potrebe trenutnog broja potrošača. Ukupna vrijednost projekta iznosi oko 950.000 KM. Od ovog iznosa žitelji Stjepan Polja su obezbijedili 640.000 KM, Vlada FBiH 150.000 KM, Vlada TK 100.000 i Općina Gračanica 60.000 KM (portal BKC Gračanica).

27. 12. 2010.

DONACIJA GRAČANIČKIH PRIVREDNIKA OPĆOJ BOLNICI

Okupljeni u Udruženju poslodavaca prikupili su 40.000 KM i donirali Općoj bolnici za kupovinu neophodne hirurške opreme kojom će se na Odjelu hirurgije izvoditi i komplikovanije laparoskopske operacije. Iz te donacije nabavljena je i ultrazvučna oprema neophodna za kvalitetniji rad ginekološkog odjela, te opreme neophodne za PC ergonomiju.

30. 12. 2010.

24. SJEDNICA OPĆINSKOG VIJEĆA GRAČANICA: JEDNOGLASNO USVOJEN BUDŽET OPĆINE ZA 2011.GODINU .

Obim budžeta iznosi 11.776. 000 KM, što je za svega 46.000 KM više u odnosu na prošlu godinu. Za kapitalne projekte i izdatke potrošit će se blizu 40% budžeta, dok je ostala potrošnja u nivou prošlogodišnje.

I ostalih 9 tačaka dnevnog reda, među kojima je i Odluka o općinskim administrativnim taksama , Odluka o izmjenama i dopunama Odluke o vršenju komunalnih djelatnosti i komunalnom redu, te Nacrt strategije razvoja Općine Gračanica 2011.–2020. godine. Takođe jednoglasno, usvojeni

su i programi rada Općinskog vijeća i Općinskog načelnika za 2011. godinu. Vijećnici su upoznati sa Informacijom o dodjeli stipendija studentima i učenicima srednjih škola, a podržali su i Statut Veterinarske stanice Gračanica, na osnovu kojeg se status ove javne ustanove mijenja u status Javnog preduzeća.

31. 1. 2011.

25. SJEDNICA OPĆINSKOG VIJEĆA: U ZNAKU ODLUKA I IZVJEŠTAJA O RADU OPĆINSKOG VIJEĆA I OPĆINSKOG NAČELNIKA U 2010. GODINI

Usvojene su sljedeće odluke: o radnom vremenu u određenim djelatnostima, o visini naknade-paušala vijećnicima i članovima radnih tijela, o izmjenama i dopunama Odluke o komunalnim taksama. Najviše pažnje izazvala je Odluka o visini naknade-paušala vijećnicima i članovima radnih tijela, koja se vezuje za prosječne neto plaće ostvarene u Federaciji Bosne i Hercegovine za prvih šest mjeseci prethodne godine (vijećnicima 50%, predsjednicima klubova 56%, i zamjeniku predsjedavajućeg 62%). Odlukom su predviđene i neke sankcije u slučajevima odsustvovanja vijećnika sa sjednica Vijeća. Trenutno neće doći do povećanja tih naknada (koje iznose od 400-500 KM mjesečno), ali će se one po automatizmu mijenjati naspram korekcija prosječnih neto primanja u F BiH.

Od ostalih tačaka, izdvajamo Izvještaj o realizaciji Programa rada Općinskog vijeća za 2010. godinu i Izvještaj o realizaciji programa rada Općinskog načelnika za 2010. godinu.

Konstatovano je da je Općinsko vijeće ostvarilo svoj program rada u prošloj godini u prosjeku 90%, da je aktivnost vijećnika bila zadovoljavajuća te da je ostvarivana dobra saradnja sa općinskim načelnikom, općinskim službama za upravu, mjesnim zajednicama itd.

U izvještaju o radu Općinskog načelnika konstatuje se da su ključni ciljevi njegovog programa rada u prošloj godini izvršeni i pored objektivnih teškoća, recesije, poplava itd. Učinjen je pomak u stvaranju boljih uslova

i povoljnijeg ambijenta za ostvarivanje prava građana, privrednih i drugih subjekata i ukupno boljeg života građana u lokalnoj zajednici. Uz osavremenjivanje rada službi i njihovo osposobljavanje da budu istinski servis građana i lokalnog biznisa i u pogoršanoj budžetskoj situaciji skoro 2/3 budžetskih sredstava usmjereno je u razvojne projekte, sitnije i krupnije s ciljem da se poboljša život ljudi na ovom području, dok je 1/3 utrošena za plate i ostale troškove općinske administracije, koja je i u prošloj godini smanjena za nekoliko izvršilaca. S druge strane, ogromne potrebe, posebno u oblasti komunalija i komunalne infrastrukture (lokalni putevi) i socijale i nedostatna budžetska sredstva za njihovo podmirenje stvaraju golemi jaz između potreba i mogućnosti, koji objektivno izaziva nezadovoljstvo kod mnogih građana i drugih subjekata. U uslovima opće ekonomske krize smanjena je spremnost građana da ulažu vlastita sredstva u rješavanje određenih komunalnih problema kao što je to bilo u ranijem periodu.

10. 2. 2010.

NOVI PREMIJER VLADE TK – GRAČANLIJA SEAD ČAUŠEVIĆ, NAKON IZGLASAVANJA U SKUPŠTINI (26 POSLANIKA "ZA", 7 "SUZDRŽANO") "UVEO U POSAO" SVOJU EKIPU

Svečanom zakletvom 12 ministara na čelu sa mandatarom položilo je zakletvu pred poslanicima Kantonalne skupštine nakon višemjesečnog stranačkog natezanja oko konstituisanja vlasti, prema rezultatima općih izbora održanih 3. 10. 2010. godine. Tako je definitivno "zavladala" crveno-zelena (u narodnom žargonu "hajneken" ili "zvijezda tjera mjeseca") koalicija, doskora nemoguća kombinacija ljutih protivnika SDP i SDP, koji će imati apsolutnu većinu u kantonalnoj skupštini. Osim premijera, SDP kao pobjednička stranka dobio je 6 ministarskih mjesta, SDA 5 i njihov koalicioni partner Stranka Radom za boljitak 1 ministarsko mjesto. SDA je tokom konstituisanja Skupštine kantona "dobila" i fotelju pred-

sjednika Skupštine u koju je zasjeo nekadašnji premijer ove Vlade Bajazet Jašarević. U naredne četiri godine, osim premijera Čauševića, glavni likovi u Vladi TK bit će: **Bego Gutić** (SDA), ministar unutrašnjih poslova, **Alen Taletović** (SDP), ministar pravosuđa i uprave, **Nađa Avdibašić Vukadinović** (SDP), ministrica za obrazovanje, nauku, kulturu i sport TK, **Senija Bubić** (SDA), ministrica za prostorno uređenje i zaštitu okoliše, **Mladen Lazić** (SDA), ministar finansija, **Željko Knežiček** (Stranka radom za boljitak), ministar za industriju, energetiku i rudarstvo, **Aziz Čačković** (SDP), ministar trgovine, turizma i saobraćaja, **Imšir Škahić** (SDA), ministar poljoprivrede, šumarstva i vodoprivrede, **Nada Pavlović Čalić** (SDP), ministrica zdravstva, **Sead Hasić** (SDP), ministar za rad i socijalnu politiku, **Dijana Bilanović** (SDP), ministrica za obnovu, razvoj i povratak i **Asim Aljić** (SDA), ministar za boračka pitanja TK.

I dok je inaugurativni ekspozije premijera zračio umjerenim optimizmom, ogroman broj članova i simpatizera i jedne i druge stranke, razočarani ovom koalicijom, zeleno-crvenu vladu dočekuju sa velikom dozom skepticizma. Prenosimo jedno karakteristično reagovanje sa portala "Tuzlarije": "Vlada ima 6 ministara pravnika + pravnik premijer, to je 7 pravnika, jedan sociolog, jedan profesor tjelesnog odgoja, jedan rudar, jedan doktor (medicina), sa iskustvom i kapacitetima malo poznatim. Vlada treba da rješava najveće probleme u TK a to su: 1) zapošljavanje, 2) posrnulu privredu, 3) standard, 4) obrazovanje, 5) infrastrukturu itd. Zamislamo da li ovaj sastav može ikakav pomak uraditi, kad nijedan od ministara nije radio u privredi, ili nekom preduzeću gdje se stvara dobit. Što bi narod rekao "Daj bože da te beg uzme". Sastav vlade, kapaciteti pojedinačno i ukupno je više nego upitan, da ne kažem ispod svakog očekivanja..."

Inače, Sead Čaušević, treći je premijer Vlade Tuzlanskog kantona iz Gračanice. Hoće li imati više sreće i uspjeha u odno-

su na svoja dva prethodnika—Hazima Vikala (SDA), koji je smijenjen i Senahida Šakovića (SDP), koji je "vladao" svega dvije godine (jer je SDP izgubio izbore 2002.), pokazat će vrijeme koje novom premijeru nimalo nije naklonjeno.

24. 2. 2011.

USPJEŠNA EVAKUACIJA ZAPOSLENIKA "ŠIRBEGOVIĆ – LIBIJA"

Nemiri i demonstracije, koji su sredinom februara zahvatili Libiju, ozbiljno su zaprijetili da ugroze sigurnost zaposlenika firme "Širbegović–Libija" (kao idrugih stranih kompanija u toj zemlji). Faruk Širbegović, predsjednik Širbegović grupe se stoga, odmah po saznanju o događanjima u Libiji, obratio Predsjedništvu Bosne i Hercegovine, te Ministarstvu vanjskih poslova BiH i Ministarstvu sigurnosti BiH, sa zahtjevom, da se izvrši hitna evakuacija zaposlenika Širbegović grupe, koji su angažirani na gradilištima u Libiji.

Istovremeno je u sjedištu kompanije formiran krizni štab, koji je danonoćno zasjedao, kako bi se iznašlo rješenje za evakuaciju zaposlenika. Usprkos lošim i na momente prekinutim vezama sa Libijom, uspjela se uspostaviti veza sa zaposlenicima, a redovno su informisani i članovi njihovih porodica u BiH, o stanju njihove sigurnosti. Svesrdnu pomoć je pružila i Ambasada BiH u Libiji.

Brojni naponi su konačno urodili plodom i 24. 02. 2011. g. su svi zaposlenici Širbegović grupe, kao i radnici kooperantskih firmi, uspješno evakuirani iz Libije.

Tim povodom, Kompanija Širbegović je uputila javnu zahvalnost Ministarstvu vanjskih poslova Bosne i Hercegovine, Ambasadi BiH u Libiji, kao i Ambasadama BiH u Španiji, Austriji, Italiji i Sloveniji, na saradnji u toku evakuacije zaposlenika ove kompanije. Iskazana je i zahvalnost Ambasadoru Kraljevine Španije u BiH, NJ.E. g. Alejandro Enrique Alvargonzales San Martin, na pruženju pomoći i podršci.

Brigu o imovini firme "Širbegović – Libija" su za sada preuzeli libijski partneri.

Kada će doći do nastavka izvršavanja ugovorenih poslova u Libiji još je neizvjesno i to ovisi isključivo o toku dešavanja u ovoj zemlji. Zaposlenici koji su vraćeni iz Libije će, u skladu sa potrebama i mogućnostima, biti raspoređeni na druga gradilišta.

28. 2. 2011.

26. SJEDNICA OPĆINSKOG VIJEĆA: USVOJENO VIŠE ODLUKA IZ OBLASTI URBANIZMA I PROSTORNOG UREĐENJA

Nakon kraćih rasprava Vijeće je usvojilo sljedeće odluke: Odluka o usvajanju i provođenju regulacionog plana "Radna zona III" Gračanica, Odluka o snabdijevanju toplotnom energijom stambenog i poslovnog prostora u Gračanici daljinskim grijanjem i uslovima za isporuku i preuzimanje toplotne energije, Odluka o zonama sanitarne zaštite i zaštitnim mjerama za izvorišta Sklop, Seljanuša i Hadžijina voda za snabdijevanje vodom za piće općine Gračanica, Odluka o zonama sanitarne zaštite i zaštitnim mjerama za izvorišta Vrela i Ilidža za snabdijevanje vodom za piće općine Gračanica, Odluka o naknadi za rad predsjednicima i članovima upravnih i nadzornih odbora, Odluka o primjeni statusa nepokretnosti u opštoj upotrebi, Odluka o imenovanju komisije za davanje stručne ocjene u postupku izdavanja urbanističke saglasnosti

Pored nabrojanih odluka iz oblasti urbanizma i prostornog uređenja, Vijeće je usvojilo i Odluku o izmjenama i dopunama odluke o općinskim priznanjima, Plan upisa učenika u prvi razred ju gimnazije "Dr. Mustafa Kamarić" Gračanica za školsku 2011/2012. godinu i Plan upisa učenika u prvi razred JU Mješovita srednja škola Gračanica za školsku 2011/2012. godinu.

Na dnevnom redu ove sjednice bile su i sljedeće informacije i izvještaji: o stanju bezbjednosti na području policijske stanice gračanica u 2010. godini, o rješavanju upravnih predmeta u službama za upravu općine, o realizaciji odluke o obavljanju volonterskog rada, o stanju klizišta sa prijedlogom mjera sanacije i finansijski izvještaj o sanaci-

ji šteta nastalih usljed elementarnih nepogoda za period 01. 06.-31. 12. 2010. godine, o stanju poljoprivrede i provedenim podsticajnim mjerama na području općine Gračanica.

Vijeće je usvojilo i nekoliko rješenja i zaključaka imovinsko-pravne službe.

31. 3. 2011.

27. SJEDNICA OPĆINSKOG VIJEĆA: USVOJEN IZVJEŠTAJ O IZVRŠENJU BUDŽETA ZA 2010. GODINU.

Iz Izvještaja, izdvajamo sljedeće podatke: ukupan budžet za 2010. godinu ostvaren je u iznosu od 11.088.040 KM, od čega su: porezni prihodi 6.504.250 KM, neporezni 1.752.158 KM, potpore-grantovi 475.093 KM, primici 1.548.539 KM, Višak prihoda iz ranijeg perioda 808.000 KM, ukupni izdaci i otplate iznose 11.059.185 KM, od toga: tekući izdaci 6.430.238 KM, kapitalni izdaci 3.409.766 KM, budžetska rezerva 41.796 KM, otplate-krediti 1.177.385 KM (od toga: a/ Kredit Svjetske banke, 34.943 KM, b/Kredit kod dobavljača 1.036.642 KM, c/ Sportska sala-rata 105.800 KM.

Iskazan je i suficit-višak prihoda nad rasnodima i iznosi 28.855 KM.

U odnosu na plan-rebalans, Budžet je ostvaren manji za 1,2% ili za 134.960 KM.

Kad su u pitanju rashodi, vidljivo je da je u okviru pojedinih kategorija došlo do devijacija, tako da su neki troškovi povećani, a neki manje ostvareni (primjer: troškovi za energiju, komunalne usluge, grantovi, nabavka građevina, tekuća rezerva i dr.).

Iz analitike izdataka se vidi na koje konkretne troškove se to odnosi. Između ostalih, veći su troškovi prevoza na posao i s posla za uposlenike za 11% zbog skupljih karata, otpremnine za 7% zbog odlaska neplaniranog broja radnika u penziju, ostale naknade (smrti slučajevi, viša sila), putni troškovi za 4,90%, veći broj edukacija, seminara za uposlenike, izdaci za električnu energiju 16% zbog troškova Sportske sale, ugalj, centralno grijanje 7,62%-stvarni utrošak energije, zimska služba 12,28%, ekologija 27% namjenska sredstva Kantona, izdaci za van-

sudsko poravnanje 316%—presuda za klizište, vodosnabdijevanje u Pribavi za 38%—okonačana situacija, vodosnabdijevanje Buk 66%—okonačana situacija, regulacija Sokoluše 8,5%—namjenska sredstva Kantona, priključci na toplifikaciju 136%—novi priključci, budžetska rezerva 19%, zbog donacije Općoj bolnici. Nakon usvajanja Izvještaja o izvršenju Budžeta, vijećnici su jednoglasno usvojili i Izvještaj o utrošku sredstava tekuće rezerve za prošlu godinu u iznosu od 41.797 KM za hitne i nepredviđene izdatke u toku budžetske godine, te dvije odluke iz oblasti urbanizma: o utvrđivanju prosječne konačne cijene i prosječne ugovorene cijene m² korisne stambene površine na području općine Gračanica (koja iznosi 900 KM i služi kao osnovica za utvrđivanje visine naknade iz osnova prirodnih pogodnosti gradskog građevinskog zemljišta) i odluka o utvrđivanju visine naknade za pogodnost gradskog građevinskog zemljišta (rente), koja se veže za prethodnu odluku i reguliše način i postupak obračuna rente u šest gradskih zona..

Vijećnici su usvojili i Odluku o radnom vremenu u određenim djelatnostima, kojom se ograničava radno vrijeme ograničava kod pojedinih uslužnih djelatnosti u skladu sa postojećom zakonskom legislativom. Nakon kraće rasprave, Vijeće je uputilo na javnu raspravu Nacrt odluke o spomen-obilježjima na području općine Gračanica, koja će trajati 30 dana, a potom dalo saglasnost na odluku o izmjenama i dopunama statuta JZU Dom zdravlja Gračanica. U nastavku sjednice bez veće rasprave vijećnici su usvojili izvještaje o radu i finansijskom poslovanju u 2010. godini sljedećih javnih ustanova u Gračanici: Dječjeg obdaništa “Naša djeca”, Centra za socijalni rad, Veterinarske stanice i Bosanskog kulturnog centra.

20. 04. 2011.

DRUGI GRAČANIČKI SAJAM PODUZETNIŠTVA I OBRTA “SAPO 2011.” GRAČANICA (OD 20. DO 23. 04. 2011.)

Nakon obimnih priprema, u prisustvu visokih gostiju, privrednika i mnogobroj-

nih građana otvoren je Drugi gračanički sajam, ove godine pod nazivom “Sapo 2011” u organizaciji BKC Gračanica i u partnerstvu sa Općinom i Udruženjem poslodavaca Gračanica. Otvaranju sajma prisustvovali su ambasadori: Francuske – Roland Žil, Makedonije–Rami Redžepi i Albanije – Flamur Gaši, te konzul Republike Hrvatske u Tuzli gospodin Josip Juras. Od domaćih gostiju, otvaranju su prisustvovali: potpredsjednik Federacije BiH, g-dina Svetozara Pudarića, predsjednik Vlade F BiH Nermin Nikšić, premijer Vlade TK Sead Čaušević, zatim ministri u Vladi F BiH i Vladi TK, predstavnik privredne komore Švedske i Norveške gosp. Slobodan Nešković, predstavnici izvršne i zakonodavne vlasti susjednih gradova i općina, kao i predstavnici više privrednih udruženja asocijacija iz Bosne i Hercegovine.

Ceremonija otvaranja počela je tačno u 11.00 sati, pozdravnim govorom Općinskog načelnika Nusret Helića, koji je iznio i osnovne karakteristike ovogodišnjeg Sajma.

“Ovaj Sajam je u prvom redu zamišljen kao jedan veliki izlog gračaničke privrede i gračaničkog biznisa, ali i Gračanice kao cjeline i grada u kojem je lijepo živjeti i u koji se isplati ulagati. Za nas je ta poruka važna upravo u ovoj recesiji, upravo u ovoj općoj društvenoj depresiji.

U Gračanicu se uvijek dolazilo “da se vidi nekog posla” – kako su govorili naši stari. Na toj poduzetničkoj tradiciji, upravo na poticaj naših poduzetnika, a njih ima preko 1.100 manjih i većih, i ušli smo u organizaciju Sajma, kojim želimo, prije svega, promovisati privredni potencijal i poduzetnički duh Gračanice.

Sa više od 20 registrovanih malih i srednjih preduzeća i zanata na hiljadu stanovnika, Gračanica je visoko iznad prosjeka Bosne i Hercegovine, gdje je, prema statistici, registrovano svega 8 firmi na hiljadu stanovnika. To su pokazatelji koji nam govore da smo, nažalost, još uvijek daleko ispod prosjeka Evropske unije koja ima 70 registrovanih firmi na hiljadu stanovnika.



■ DETALJ SA OTVARANJA SAJMA - GOVORI NERMIN NIKŠIĆ, PREDSDJEDNIK VLADE F BiH

Stoga i želimo da se ovakav jedan sajam profilise baš u Gračanici, želimo ostvariti pozitivan utjecaj na privredni razvoj i stvaranje pozitivne poduzetničke klime, povećanje konkurentnosti privrednog sektora, te bolje međusobno povezivanje privrednih subjekata i poduzetničkih regija i stvaranje jasne spoznaje o vlastitim snagama i privrednim vrijednostima.

Za nas 'Sapo 2011.' nije isključivo sajam komercijalnog tipa, nego je on ujedno i razvojni projekat lokalne zajednice."

Nakon pozdravnog govora Općinskog načelnika, prisutnima su se kratko obratili predsjednik Vlade F BiH Nermin Nikšić i premijer Vlade TK Sead Čaušević, koji su nakon toga, presijecanjem vrpce simbolično otvorili ovogodišnji Sajem.

Na konferenciji koja je održana poslije otvaranja i obilaska Sajma, okupljenim privrednicima i ostalim gostima Sajma, gospoda Nikšić i Čaušević predstavili su planove, odnosno namjere svojih vlada i njihovih re-

sornih ministarstava u oblasti poduzetništva. Potom se otvorio dijalog u kojem su privrednici dali nekoliko korisnih prijedloga za otklanjanje administrativnih i drugih smetnji poslovanju domaćih kompanija, posebno izvoznika.

Inače, na sajmu izlaže svoje proizvode preko 150 izlagača, na osnovu čega se već mogu dati prve pozitivne ocjene o uspjehnosti sajma. Zasluge i priznanje, kako je to u svom pozdravnom govoru istakao općinski načelnik, zaslužuje u prvom redu BKC Gračanica kao organizator Sajma, te partneri projekta: Udruženje poslodavaca i samostalnih privrednika Gračanica, Obrtnička komora Tuzla, Njemačko društvo za međunarodnu saradnju GIZ, Federalno ministarstvo poduzetništva, obrta i razvoja, Vlada TK, sa resornim ministarstvom, te Klaster plastičara i alatničara Gračanica.

Da podsjetimo i na ostale aktivnosti i konferencije: Drugog dana Sajma predstavnici Evropske banke za obnovu i razvoj

prezentirali su svoje programe podrške privrednom razvoju BiH, a potom je održana konferencija o poduzetničkim zonama i inkubatorima (iskustva i problemi).

Treći dan bio je rezervisan za aktuelna pitanja poticaja poljoprivrede i ruralnom razvoju. U završnici sajma, četvrtog dana obavljena je prezentacija učinaka Sarajevo biznis foruma 2011. i otvorene mogućnosti saradnje sa Projektom "Sapo" Gračanica.

28. 4. 2011.

28. REDOVNA SJEDNICA OPĆINSKOG VIJEĆA GRAČANICA: USVOJENA STRATEGIJA RAZVOJA OPĆINE GRAČANICA 2011.–2020. GODINA

To je, kako stoji u uvodu, ključni strateško-planski dokument općine Gračanica, koji treba da podstiče budući rast i razvoj zajednice. Razrađuje društvenu i ekonomsku sferu, ali i aspekte zaštite i unaprjeđenja životne sredine i prostora. Daje okvir za definisanje zajedničkih ciljeva, podsticanja lokalnih snaga, ali i odgovor na izazove budućeg razvoja općine i sveukupnog života u njoj. Usaglašena je sa strategijama i politikama na višim nivoima vlasti, ali i sa drugim sektorskim strategijama na državnom, entitetskom i kantonalnom nivou. Putem ovog dokumenta informiše se sveukupna javnost i privatni ulagači o razvojnom putu općine, te predstavlja osnovu za izradu detaljnih planova i programa u pojedinim sektorima, kreira osnovu za praćenje napretka te ohrabruje saradnju i dogovor u planiranju različitih nivoa vlasti i društveno-ekonomskih partnera. Definirana je kao putokaz za sveukupni razvoj općine Gračanica, a obuhvata ekonomski, društveni i plan zaštite i unaprjeđenja životne sredine, uz poštivanje prostornog aspekta. Sadrži listu prioriteta programa i projekata u svakom sektoru, a koji omogućavaju ostvarenje postavljenih ciljeva putem provođenja operativnih aktivnosti, čime se stvara osnovu za sveukupnu implementaciju Strategije. Nadalje, prioritetni programi i pro-

jekti nisu samo osnova za korištenje općinskih i drugih domaćih izvora sredstava, nego i dobra osnova za pristup eksternim izvorima sredstava, poput IPA programa Evropske unije, ali i drugih programa podrške u Bosni i Hercegovini.

Vizijom i strateškim ciljevima formulisane su jedinstvene konkurentne pozicije koju Općina u budućnosti namjerava dostići u relevantnom okruženju, koristeći konkurentne prednosti i princip održivosti. Vizija Općine Gračanica definisana je za period do 2020. godine, polazi od sljedećih principa: "Unapređujući poslovni ambijent i okruženje, koristeći i razvijajući privredne potencijale i prirodne i ljudske resurse obezbijedit ćemo nove investicije, novo zapošljavanje i stvoriti novu vrijednost za brže rješavanje ekoloških problema i cestovne infrastrukture i kroz bolje organizovan društveni sektor i javne usluge učiniti građane zadovoljnijim i sretnijim, a Gračanicu sredinu evropskih metropola".

Pored ovog strateškog dokumenta ijećnici su usvojili, bez većih diskusija još i sljedeće materijale: Program kapitalnih investicija Općine Gračanica za period 2010.–2014. godine, tri odluke (o izmjenama Odluke o pristupanju izrade Prostornog plana općine Gračanica, o promjeni statusa nepokretnosti u opštoj upotrebi (k.č. br. 6/46), o promjeni statusa nepokretnosti u opštoj upotrebi (k.č. br. 495/11) i o dodjeli općinskih priznanja – u nacrtu). Usvojeni su i izvještaji o radu i finansijском poslovanju u 2010. godini javnih zdravstvenih ustanova Općinske bolnice "Dr. Mustafa Beganović", "Gradska apoteka" i Dom zdravlja.

Razmatrana je i epidemiološka situacija na području općine Gračanica u periodu 01. 01. – 31. 12. 2010. godine, te usvojen izvještaj o realizaciji Programa kapitalnih investicija Općine Gračanica u 2010. godini. ♦

